



205  
46

# QUÆSTIO MEDICA,

CARDINALITIIS DISPUTATIONIBUS,

*manè discutienda, in Scholis Medicorum,  
die Jovis vigesima-quarta Martii.*

M. PETRO DAQUIN, Doctore Medico,  
Regis ordinario, Præsidente.

*An Vere piscium esus salubris?*

I.

**D**IÆTA partium Medicinæ præstantissima & difficillima, neutiquàm potest ægris, sanis, medioque modo se habentibus præscribi, nisi naturæ minister, imitator, & corrector Medicus, anni tempestatum potentiam probè teneat; non enim simile quid in illis existit, verùm differunt invicem, propter varias quæ in eis fiunt mutationes: ventres alio modo se habent Vere ac autumnno, æstate ac hyeme: Cibi substantia, quantitas, qualitas, utendi ratio animo perpendenda, cum calore nostro naturali coque elementari comparanda. *ἑπικτα δυσπεπτοῖς, εὐχρησά κακοχρήμοις*, mediam consistentiam sortita, crassis ac tenuibus, Veris præsertim tempore præferenda: ab his modò refocillatur, modò fatiscit, suique jacturam patitur. Salubris cibus qui sanitatem conservat & efficit, pro variis temporibus varius exhiberi debet, talisque dicitur collatione tempestatis cum naturâ corporis nostri. Æstate & autumnno alimenta sumi debent pauca, bona, & sæpè: hyeme multa, item Vere, at mediocritèr nutriticia.

**A**LIMENTUM quicquid totius substantiæ familiaritate in corporis animati substantiam converti potest, veneno oppositum, (inter utrumque medicamentum obtinet locum) patiens & agens corpus est; quod sumitur ex plantis, animalibus, eorûque partibus ex quatuor elementis compositis actu remanentibus, non ex terrâ, aquâ, igne, aëre, binis & intensis qualitatibus affectis, nec imperfectè mixtis, ut meteoris & mineralibus; ex animalibus salubrius desumitur alimentum, quàm ex plantis, quòd à calore nostro subigitur, eumque auget hyeme & vere magis, quàm æstate & autumnò. Pro vario syderum ortu, & occasu, à quibus discriminantur anni tempestates, calor vegetior imbecilliorque redditur, ut pro ratione locorum vita productior. Hyeme, ut Septentrionalibus longævis, intensus calor, bona concoctio. Æstate, ut Meridionalibus, utrumque debile. Autumnò, ut Occidentalibus infirmis, inæqualis calor. Vere, ut Orientalibus, omnium saluberrimè vitam degentibus, temperatis, & quibus proluxior vita, temperatura media similibus conservanda.

## I I I.

**A**NIMALIA terrestria, volatilia, aquatilia, dedit natura hominibus pro escâ: è quovis genere, quæ in omnis excessûs mediocritate consistunt, eligenda. Aquatilia animalia bonitate terrestribus & volatilibus non sunt inferiora, hæc ἀφωρα, morbis ut reliqua non ita obnoxia, saluberrimum hominum corporibus sunt alimentum, minimè medicamentosum: pisces lacustres fluviatilibus cedunt, ut fluviatiles & ἀναδεδυγσι, marinis omnium saluberrimis, ex quibus saxatiles inter littorales & pelagios

palnam obtinent, & qui præcipuè in Oceano, quàm in Mediterraneo degunt, *ἐυπεπτοί*, non *ἐυφθάρτοι*, cum avibus montanis comparandi, sanguinem consistentiâ medium generant, nec nimis tenuem, nec crassum, ægris etiam exhibendi, ut tertianâ exquisitâ laborantibus, picrocholis, calculosis. Nullum convenientius alimentum ubi natura media, calor mediocris qualis Vere reperitur, non autumno, æstate, & hyeme, quæ anni tempestates *ἀνεργοί*, plurimis morbis obnoxia.

## I V.

**E**X piscibus eligendi staturâ & ætate mediocres, non vetusti ( excepto nullo ) ex eorum partibus quæ exercitatissimæ, ut caudam & dorsum spectantes, quæ caput, ventrem, & quæ ex his pingues sunt peiores: gravi plurimi Vere sunt meliores, marini recentèr expiscati lepram inducunt, saliti non salitis insalubriores, molles & friabiles longè præstantiores glutinosi: quibus inculcata est valetudo iis pisces *ἐκ τῆς ἀνθου* maximè conveniunt, ut iussulenti ægrotis: à sartagine humiditas excrementitia piscium absimitur, eorum friabilior redditur caro, gustu suavior, concoctu & distributu facilior, non absimilis illi quam gallinæ, capones, phasiani, perdrices, attagenes, columbæ, merulæ, turdi, turtures, passeruli supeditant.

## V.

**V**ER prima anni tempestas, quo tempore Mundus creatus fuit, ab æquinoctio verno incipiens, & in ortum pleiadum, æstatis initium desinens, omnium saluberrima, ut temperata non calida & humida, in quâ temperatis & euchymis est utendum cibis, non ita leguminibus, rectissime piscibus, ex quibus tamen minùs laudandi qui duræ

sunt carnis, ut dracones, cuculi, mustelli, pagri, muli, nam ægrè conficiuntur, succosque crassos in corpus distribuunt; at eligendi qui molli friabilique carne sunt præditi, lucii, gobiones, percæ, soleæ, passeræ, rhombi, barbata, aurata, post hos aselli, hamia, jecorarii, cythari, umbræ; omnes isti faciliùs quàm cæteri concoquantur, distribuuntur, & laudatissimum calori nostro pabulum præbent.

*Ergo Vere piscium esus salubris.*

Proponebat Parisiis DANIEL TAUVRY, Cœnomanensis Lavalleus,  
Baccalaureus Medicus, A. R. S. H. 1695.

---

Apud Franciscum Muguet, Regis & Facultatis Medicinæ Typographum.